

Mladi Konjica protiv izgradnje brana na Neretvi

27 February 2007

Svoj glas za očuvanje gornjeg toka Neretve od izgradnje velikih brana još jednom je iskazala konjička omladina. Organizacijom rock koncerta u Konjicu pod simboličnim nazivom: "Pusti, bolan, rijeku neka teče" mladi su jasno izrekli svoj stav da budućnost u Konjicu ne vide bez Neretve. U sklopu opće kampanje protiv brana na Neretvi organizacija Vijeće mladih, uz pomoć udruženja Zeleni - Neretva te par drugih udruženja i pojedinaca iz Konjica, je u subotu (24.02.2007.) organizovala rock koncert konjičkog benda Meteory.

Pozitivna atmosfera tokom trajanja koncerta u prepunoj sali legendarne "Pivnice" je dokazala da mladi Konjica ne žele sjediti skrštenih ruku i čekati da im budućnost kroji neko drugi.

Ova akcija je samo dio već aktivnosti kojom Vijeće mladih želi da pomogne kampanju za zaštitu rijeke Neretve od izgradnje novih brana, te nakon koncerta slijedi izrada i distribucija informativno-propagandnog materijala.